

Bush ed il desaster iracais


Quant enavant resguarda'l ils cussegls dals diesch «sabis»?

DA GUIU SOBIELA-CAANITZ

■ «The situation in Iraq is grave and deteriorating – La situaziun en l'Irac è greva e va da mal en pis»: Uschia entschaiva il rapport ch'ina «Gruppa da studis per l'Irac» (GSI) da diesch personalitads ha inoltrà ils 6 da decembre a president George W. Bush, als manders dal senat e da la chombra dals represchentants e finalmain a la publicitat. Tuts tschintg commembers democrats e quatter republicans, sco era l'unica commembra republicana, avevan approvà il text elavurà da cuminanza, mettend en evidenza l'unitad patriotica da las duas partidas grondas en ina dumonda che dominescha la vita politica dal pajais. Ina tala responderaziun fascheva basegn, suenter la victoria da la partida democrita tar las elecziuns dals 7 da novembrer en las duas chombras. La GSI recumonda da surdar plaun a plaun «primary responsibility for combat operations» a l'armada iracaissa, uschè che las forzas dals Stadis unids duajan be pli las sustegnair e possian turnar a chasa per l'emprim trimester da 2008. A medem temp, uschia la GSI, duess Washington entschaiver dala lunga «a new diplomatic offensive to build an international consensus for stability in Iraq and the region». Il rapport descriva qua ina visiun precisa che tuna per rumantsch sco suonda: «Tuts stadis limitrofs da l'Irac ed ils stadis-clavs en la regiun ed ordaifer duessan furmar ina gruppa da sustegn per rinforzar la segirad e la reconciliaziun naziunala en l'Irac». Da lezza offensiva diplomatica faschess part «in engaschi renovà e rinforzà per ina pasch sin tuttas fronts tranter Arabs ed Israelis». Co accepta la pubblicitat la diagnosa ed il recept da la GSI? La diagnosa vegn generalmain approvada, ma il recept vegn mess en dumonda da pliras varts. President Bush, responsabel da la politica estra e militara fin a decembre 2008, ha già refusà propostas essenzialas dals diesch «sabis». Ins sto temair che la situaziun peggiora vinvant, enfin ad ina disfatga irreparabla che sfurzass Washington a sa retrair en tutta prescha. Quai è daventà duas giadas en Viêt-Nam; 1954 èsi tutgà a la Frantscha, 1973 als Stadis unids. I vala la paina d'examinar pli manidlamain las propostas da la GSI e las criticas ch'ellas provocheschan.

Objecziuns e refusas

In emprim punct flaivel resguarda il termin da schaner – mars 2008 per retrair tuttas truppas americanas da cumbat, dano 10 000 – 20 000 schuldads che stessan per trenar e gidar l'armada iracaissa. La classa politica tranter Boston e Los Angeles sa sentiss seguir vaira meglier sch'ils plis «boys and girls» dal pajais fissan puspè a chasa per las elecziuns da novembre 2008. «The Economist» dals 9 da decembre (p. 10) exprima cleramain las objecziuns strategicas che vegnan endament: «Quai po indeblir ils Stadis unids tar tractativas, intensifitgar ils cumbats empè d'als calmar e crear in'aparientscha da flaivelleza che dess curaschi a tuts inimis [dal pajais]». Plinavant chatt'ins ils cussegls suandants en il rapport da la GSI: «Damai che l'Irac e la Siria san influenzar schabetgs aifer l'Irac e ch'i fiss en lur interess da preservar quest pajais dal caos, duessan ils Stadis unids pruvar d'als obligar d'agir en in senn constructiv (...). L'Irac duess retegnair la pluna d'armas e da trenament [militar] furnida a l'Irac, respectar la suveranitat e l'integritat territoriala da quest pajais ed influenzar ils aderents iracaissa da la 'schia', encraschond la reconciliaziun naziunala [tranter Iracaissa].» Ma er en quest regard fan ins endament ch'ina reduciun massiva da las forzas armadas americanas en l'Irac (24,7 milliuns olmas) indebliss l'influenza da Washington



President Bush, responsabel da la politica estra e militara fin a decembre 2008, ha già refusà propostas essenzialas dals diesch «sabis».

KEYSTONE

ton sin l'Iran (67 milliuns). Dalander la lingia grassa da «The Economist»: «Don't do it – Faschai betg quai!» D'ina vart èsi cler che ponderaziuns fitg fermas da politica interna savessan stimular ad ina talia reduciun, tant pli ch'ins renconuscha ch'ils Stadis unids na san betg gudagnar lezza guerra. Ma da l'autra vart n'esi tuttina betg segir ch'ins sappia lur impedir il pegiurament d'ina situaziun nua che tozzels civilists moran gia mintga di en attentats tschorvs. Insumma: Per las unfrendas futuras da tals malfatgs vegnan ils buns cussegls da la GSI bler memia tard.

Resguardar Libanon e Palestina

A la recumandaziun suandanta dal rapport san ins dentant strusch cuntradir: «Ils Stadis unids na san betg cuntanscher lur finamiras en il Proxim Orient senza sa fatschentiar directamain cun il conflict tranter Arabs ed Israelis e cun l'instabilitad da la regiun (...). In tal engaschi duai includer raschienis directs cun e tranter l'Israel, Libanon, ils Palestinali – quels ch'acceptan il dretg da viver da l'Israel – e la Siria.» Co stati cun il Libanon (3,5 milliuns olmas)? Gist uss emprova la Hisbollah, la partida dals aderents libanais da la «schia» (32% da la populaziun totala) d'obtegnair ina participaziun pli effectiva a la pussanza en il pajais; ina tala concessiun pon ins cun il temp strusch refusar. Ma s'engaschar en Palestina na vul Bush tuttina betg; el manegia «ch'ils Stadis unids na possian betg sfurzar si ina schliaziun» («NZZ» dals 8 da decembre, p. 11). Uschia sa l'Israel (6,8 milliuns olmas), cun ses vitgs colonials e ses mir da bloccada, ruer vinavant vid l'intschess palestinali (3,5 milliuns).

In stadi artifizial

Il parsura da la GSI, l'antierur minister da l'exterior James Baker III, vala sco realist. Quai n'è betg adina sinonim da sabi. La «NZZ» dals 7 da decembre (p. 3) fa endament en ses commentari che Baker sez, en ils onns novanta, haja recumandà «la coesiun da Jugoslavia cur che la ruina da lezza aveva già entschavi». La Jugoslavia han stgaffi ils victurs da l'emprima guerra mondiala sco «reginam dals Serbs, Croats e Slovens»; 1929 ha il pajais survegnì il num ch'ins ha duvrà vinavant enfin a l'entschatta da noss tschientaner. Era l'Irac è ina creaziun artifiziala dals victurs da 1918, cunzunt da la Gronda Britannia che ha occupà ina gronda part dal pajais suenter l'armistizi, supprimì 1920 en il sang in'insurrezioni araba e stgaffi in reginam arab cun las elites, ma senza ils aderents da la «schia». 1925 ha la Societad da las nazions attribui regiuns curdas a l'Irac, malgrà petiziuns e rebeliuns dals pertugads. Pir la disfatga iracaissa en la segunda guerra dal golf ha possibilità als Curds

da l'Irac da s'organisar sezs 1992 a moda fitg autonoma. En il rest dal pajais ha l'occupaziun americana 2003 dà las responsabladads principalas als aderents da la «schia» che furman 2/3 da la popolaziun totala. Il rapport da la GSI recumonda mesiras variadas per promover la reconciliaziun tranter las duas cuminanzas arabas islamicas; ma tge pon ins far en ils quindesch mais a disposiziun enfin a la retratga da bunamain tuttas truppas americanas?

Vegn il pajais parti?

Dalander l'opposiziun da senatur Joseph Biden, il futur president da la cumissiun da politica exteriura; el crititgescha che la GSI na cussegli betg da parter l'Irac. Fiss quai ina schliaziun? Cuntents fissan segir ils Curds, oramai già autonoms; ma i stuessan spetgar la ferma opposiziun dals dus gronds pajais limitrofs, l'Iran e cunzunt la Tirchia, ils quals temessan l'attraciun da la libertad per lur agens Curds. Ins stuess cunzunt spetgar ch'ins na possia betg zavrà ils aderents da la «schia» da tschels muslims senza expulsions inumanas e forsa schizunt mazzacras; quai faschess endament las «purificaziuns etnicas» da Bosnia-Erzegovina e perfin la partiziun da Pungjab 1947 tranter l'India e Pakistan (passa 180 000 morts). Tiers vegnan las confessiuns pitschnas che na fissan pli nagliu a chasa. La Societad per ils pievls smantschads* ha dà part en novembre 2006: «Dals 700 000 cristians da l'Irac èn al-main 150 000, forsa schizunt 300 000 en fugia. Var 20 000 vivan sco fugitivs en il Kurdistan iracaissa; quest stadi autonom è già plain fugitivs.» En l'Irac dal sid surviva anc in'antica cuminanza ordvart pitschna che venerescha s. Gion Battista e manegia che l'uman possia cuntanscher il spendrament pir renconusched ch'il mund saja essenzialmain nausch; a lezza enconuschiantscha dattan quels cartents il num arameic da «manda» che serva savens per designar la cuminanza sezza. Ins n'astga tuttina betg giavischar ina partiziun da l'Irac; ina tala conclusiun chaschunass suffrientschas senza fin e munlass il confess d'ina disditga moral. Ma il rapport da la GSI, cun tut sias mancanzas, resulta dal desaster che ha entschavi 2003 cun la conquista da l'Irac. I pudess tuttafat vegnir adaquella che la situaziun adina mendra intimeschia finalmain Washington da sa retrair en tutta prescha da l'Irac. Las consequenzas na tutgassan betg Bush, oramai pensiùn sin ses bain rural texan, mabain ils pievls da l'Irac, che stuvesan anc purtar malencurada per nundumbraylas unfrendas d'ina guerra civila provocada da l'invasiun.

* Adressa: Gesellschaft für bedrohte Völker, Postfach 20 24, D-37010 Göttingen.

Fax 0049 551 58028.

Posta electronica: info@gfbv.de